

本國學基
叢書

高常侍集



書叢本基學國

集 侍 常 高

著 適 高



行發館書印務商



圖書基本法

圖書分類法

圖書標記法



圖書編目法

中華民國三十年六月初版

(80923.1)

☆ 國學基本叢書 高常侍集 一册

每册實價國幣貳角伍分

外埠酌加運費匯費

著者 高適

發行人 王雲五

長沙南正路

印刷所 商務印書館

發行所 各埠商務印書館

朱

• I 110

圖書基本法

圖書分類法

圖書管理



圖書分類法

高常侍集卷上

唐 渤海高 適著

賦

東征賦

歲在甲申秋窮季月高子遊梁既久方適楚以超忽望君門之悠哉微先容以效拙姑不隱而不仕宜其
 漂淪而播越出東苑而遂行沿濁河而茲始感隋皇之敗德割平原而爲此西馳洛汭東並淮浹地豁山
 開川流波委六宮景從千官邈迤龍舟錦帆照耀乎數千百里大駕將去羣盜日起尸祿者卷舌而偷生
 直諫者解頤而後死寄腹心於梟獍任手足於蛇虺既垂弑於匹夫尙興疑於愛子豈不以爲窮力役於
 征戰務淫逸於奢侈六軍悲牧野之師萬姓哭遼陽之鬼嗟顛覆於曩日指年代於流水唯見長亭之煙
 火曠野之荆杞至鄴縣之舊邑懷蕭相之高風既屈節於主吏每歸誠於沛公始俱起於天下乃從定於
 關中推金帛於他人挹圖籍於我躬按山川之險阻救天地之屯蒙嘉盈俸以增邑方指蹤而建功納邵
 平以防患舉曹參而告終經洛城而永望想譙郡而銷憂慨魏武之雄圖終大濟於橫流用兵戈以威四
 海挾天子而令諸侯乃擅命以誅伏徒矯迹以安劉吾始未知夫逆順胡甯比德於殷周下符離之西偏
 臨彭城之高岸連山鬱其漭漭大澤平乎渺漫昔天未厭禍項氏叛渙解齊歸楚自蕭擊漢天地無色風
 塵潰亂憫君王之轆軻混士卒以奔散苟炎運之克昌豈生人之塗炭次靈璧之逆旅面垓下之遺墟嗟

020017

魯公之慷慨。聞楚聲而悒於歌。拔山以涕洟。竊霸圖而莫居。擯亞父之何甚。悲虞姬之有餘。出重圍以狼狽。至陰陵以躊躇。顧天亡以自負。雖身死兮焉如。登夏邱而縱目。對蒲隧而愁予。聞取慮之斯在。微長直之捨諸。宿徐縣之迴津。惟偃王之舊域。方以小而事大。豈無位而有德。彼皆昏暴以喪邦。伊何仁義而亡國。高延陵之掛劍。慕班彪之述職。緬沛水之悠悠。俯婁林之紆直。卽日河澣。依然泗上。山川土田。耳目清曠。眺淮源之呀豁。偉楚關之雄壯。掛輕席於中流。順長風以破浪。過盱眙之邑屋。傷義帝之波蕩。歎三戶之亡秦。知萬人以離項。越龜山而訪泊。入漁浦而待潮。鴻鴈飛兮木葉下。楚歌悲兮雨蕭蕭。霜封野樹。水凍寒苗。岸草無色。蘆花自飄。幸息肩於人事。願投迹於漁樵。思魏闕而天遠。向秦川而路遙。候鳴雞以進帆。趨亂流以爭迅。縱孤舟於浩大。撫垂堂以誠慎。遵枉渚於淮陰。徵昔人於韓信。哀王孫之寄食。嘉漂母之無慍。鄙亭長之不仁。乃晨炊而嗇悵。忽從龍以獲聘。遂擒豹以自奮。破全趙而用奇。稱假齊而益振。幸辭通以感惠。俄結豨而謀豎。當在約而必亨。曷持盈而不順。凌赤岸之迢遞。掉白波之紆餘。歷山陽之村墅。挹襄鄙之邑居。人多嗜艾。俗喜觀漁。連葭葦於效甸。雜汀洲於里閭。感百川之朝宗。彌結念於歸歟。日杲杲以麗天。雲飄飄以卷舒。魯放情於蹈海。邱永歎於乘桴。遇坎則止。吾今不知其所如哉。

鵲賦并序

天寶初。有自滑臺奉太守李公鵲賦以垂示。適越在草澤。才無能爲。尙懷知音。遂作鵲賦。其詞曰。夫何鵲之爲用。置之則已。縱之無匹。懷果斷之沈潛。任性情之敏疾。頭小而銳。氣雄而逸。貌耿介以凌霜。

目精明而點漆。想像遼遠。孤貞深密。將必取而乃迴。若授詞而勿失。當白帝之用事。入青雲而委質。乃徇節以勃然。因指縱而挺出。嚴冬欲雪。蔓草初焚。野漭蕩而風緊。天崢嶸而日曛。忿顧兔之狡伏。恥高鳥之成羣。始滅沒以略地。忽升騰而參雲。翻決烈以電掣。皆披靡而星分。奔走者折脇而絕脰。鳴噪者血灑而毛紛。雖百中之自我。終一呼之在君。夫其左右更進。縱橫發迹。掃窟穴之凌競。振荆榛之浙瀝。翕六翮以直上。交雙指以迅擊。合連弩之應機。類鳴髀之破鏑。豁爾胸臆。伊何凌厲。以爽朗。曾莫蝨介。豈虞險艱。而怵惕。觀其所獲。多有得用。非媒。歷閭闔以肅穆。翊鉤陳而環迴。幸輝光於蒐狩。承剪拂於樓臺。望鳳沼而輕舉。紛羽族之驚猜。路杳杳而何向。雲茫茫而不開。鶯出谷兮徒爾。鶴乘軒而何哉。彼懷毅勇。坎軻而棄置。胡不效其間關。而徘徊爾。乃顧恩有地。戀主多情。念層空而不起。託虛室以無驚。雅節表於能讓。義心激於效誠。勢逾高而下急。體彌重而飛輕。戢羽翼以受命。若肝膽之必呈。嗟日月之云邁。猶羈縻而見嬰。別有橫大海而遙度。順長風而一寫。投足眇於巖巔。脫身免於弋者。冰落落以凝閉。雪皚皚而飄灑。諒堅銳之特然。甯苦寒之求捨。匪聚食以祈滿。聊擊鮮而自假。比元豹之潛形。同幽人之在野。矧其升巢絕壁。獨立危條。心倏忽於萬里。思超遙於九霄。豈別物之能暴。曷凡禽之見邀。則未知鴛鴦之所適。孰與夫鵬鷖兮逍遙云爾哉。

五言古詩

宋中十首

梁王昔全盛。賓客復多才。悠悠一千年。陳迹唯高臺。寂寞向秋草。悲風千里來。朝臨孟諸上。忽見芒碭間。赤帝終已矣。白雲長不還。時清更何有。禾黍徧空山。景公德何廣。臨變莫能欺。三請皆不忍。妖星終自移。君心本如此。天道豈無知。梁苑白日暮。梁山秋草時。君王不可見。脩竹令人悲。九月桑葉盡。寒風鳴樹枝。登高臨舊國。懷古對窮秋。落日鴻鴈度。寒城砧杵愁。昔賢不復有。行矣莫淹留。出門望終古。獨立悲且歌。憶昔魯仲尼。悽悽此經過。衆人不可向。伐樹將如何。逍遙漆園吏。冥沒不知年。世事浮雲外。閑居大道邊。古來同一馬。今我亦忘筌。五霸遞征伐。宋人無戰功。解園幸奇說。易予傷吾衷。唯見盧門外。蕭條多轉蓬。常愛宓子賤。鳴琴能自親。邑中靜無事。豈不由其身。何意千年後。寂寥無此人。關伯去已久。高邱臨道旁。人皆有兄弟。爾獨爲參商。終古猶如此。而人安可量。

薊中作

策馬自沙漠。長驅登塞垣。邊城何蕭條。白日黃雲昏。一到征戰處。每愁胡虜翻。豈無安邊書。諸將已承恩。惆悵孫吳事。歸來獨閉門。

睢陽酬別暢大判官

吾友遇知己。策名逢聖朝。高才擅白雪。逸翰懷青霄。承詔選嘉兵。慨然卽馳軺。清晝下公館。尺書忽相邀。

留歡惜別離。畢景駐行鑣。言及沙漠事。益令胡馬驕。丈夫拔東蕃。聲冠霍嫖姚。兜鍪衝矢石。鐵甲生風飄。諸將出井陘。連營濟石橋。酋豪盡俘馘。子弟輸征徭。邊庭絕刁斗。戰地成漁樵。榆關夜不扃。塞口長蕭蕭。降胡滿薊門。一一能射鵰。軍中多燕樂。馬上何輕趨。戎狄本無厭。羈縻非一朝。饑附誠足用。飽飛安可招。李牧制儋藍。遺風豈寂寥。君還謝幕府。慎勿輕芻蕘。

答侯少府

常日好讀書。晚年學垂綸。漆園多喬木。睢水清粼粼。詔書下柴門。天命敢逡巡。赫赫三伏時。十日到咸秦。褐衣不得見。黃綬翻在身。吏道頓羈束。生涯難重陳。北使經大寒。關山饒苦辛。邊兵若芻狗。戰骨成埃塵。行矣勿復言。歸歟傷我神。如何燕趙陲。忽偶平生親。開館納征騎。彈絃娛遠賓。飄飄天地間。一別方茲晨。東道有佳作。南朝無此人性靈。出萬象。風骨超常倫。吾黨謝王粲。羣賢推郗詵。明時取秀才。落日過蒲津。節苦名已富。祿微家轉貧。相逢愧薄遊。撫已荷陶鈞。心事正堪盡。離憂甯太頻。兩河歸路遙。二月芳草新。柳接滹沱暗。鷺連渤海春。誰謂行路難。猥當希代珍。提握每終日。相思猶比鄰。江海有扁舟。邱園有角巾。君意定何適。我懷知所遵。浮沈各異宜。老大貴全真。莫作雲霄計。遑遑隨搢紳。

哭單父梁九少府

開篋淚沾臆。見君前日書。夜臺今寂寞。猶是子雲居。疇昔貪靈奇。登臨賦山水。同舟南浦下。望月西江裏。契闊多別離。綢繆到生死。九原卽何處。萬事皆如此。晉山徒嵯峨。斯人已冥冥。常時祿且薄。歿後家復貧。

妻子在遠道。弟兄無一人。十上多辛苦。一官常自哂。青雲將可致。白日忽先盡。唯有身後名。空留無遠近。

宋中遇陳二

常叅鮑叔義。所期王佐才。如何守苦節。獨此無良媒。離別十年外。飄飄千里來。安知罷官後。惟見柴門開。窮巷引東郭。高堂詠南陔。籬根長花草。井口生莓苔。伊昔望霄漢。于今倦蒿萊。男兒命未達。且進手中盃。

別王徹

歸客自南楚。悵然思北林。蕭條秋風暮。迴首江淮深。留連愁作歡。或爲梁甫吟。時輩想鵬舉。他人嗟陸沈。載酒登平臺。贈君千里心。浮雲暗長路。落日有歸禽。離別未足悲。辛勤當自任。吾知十年後。季子多黃金。

送蕭十八

常苦古人遠。今見斯人古。淡泊遺聲華。周旋必鄒魯。故交在梁宋。遊方出庭戶。匹馬鳴朔風。一身濟河滸。辛勤採蘭詠。款曲翰林主。歲月催別離。庭闈遠風土。寥寥寒煙靜。莽莽夕雲苦。明發不在茲。青天眇難覩。

宋中送族姪式顏時張大夫貶括州使人召式顏遂有此作

大夫擊東胡。胡塵不敢起。胡人山下哭。胡馬海邊死。部曲盡公侯。輿臺亦朱紫。當時有勳業。末路遭讒毀。轉旆燕趙間。剖符括蒼裏。弟兄莫相見。親族遠枌梓。不改青雲心。仍招布衣士。平生懷感激。本欲候知己。去矣難重陳。飄然自茲始。梁遊且未遇。適越今可以。鄉山西北愁。竹箭東南美。崢嶸縉雲外。蒼莽幾千里。旅鴈悲啾啾。朝昏孰云已。登臨多瘴癘。動息在風水。雖有賢主人。終爲客行子。我攜一尊酒。滿酌聊勸爾。

勸爾惟一言。家聲勿淪滓。

又送族姪式顏

惜君才未遇。愛君才若此。世上五百年。吾家一千里。俱遊帝城下。忽在梁園裏。我今行山東。離憂不能已。

同呂判官從哥舒大夫破洪濟城迴登積石軍多福七級浮圖

塞口連濁河。轅門對山寺。甯知鞍馬上。獨有登臨事。七級凌太清。千崖列蒼翠。飄飄方寓目。想像見深意。高興殊未平。涼風颯然至。拔城陣雲合。轉旆胡星墜。大將何英靈。官軍動天地。君懷生羽翼。本欲厚騏驥。款段苦不前。青冥信難致。一歌陽春後。三歎終自愧。

登壠

登壠遠行客。壠上分流水。流水無盡期。行人未云已。淺才登一命。孤劍通萬里。豈不思故鄉。從來感知己。

宴韋司戶山亭院

人幽想靈山。意愜憐遠水。習靜務爲適。所居還復爾。汲流漲華池。開酌宴君子。苔徑試窺踐。石屏可攀倚。入門見中峯。攜手如萬里。橫琴了無事。垂釣應有以。高館何沈沈。颯然涼風起。

贈別王七十管記

故交吾未測。薄宦空年歲。晚節蹤曩賢。雄詞冠當世。堂中皆食客。門外多酒債。產業曾未言。衣裘與人敵。飄飄戎幕下。出入關山際。轉戰輕壯心。立談有邊計。雲沙自迴合。天海空迢遞。星高漢將驕。月盛胡兵銳。

沙深冷陁斷。雪暗遼陽閉。亦謂掃欃槍。旋驚陷蜂蠆。歸旌告東捷。鬪騎傳西敗。遙飛絕漠書。已築長安第。畫龍俱在葉。寵鶴先歸衛。勿辭部曲勳。不藉將軍勢。相逢季冬月。悵望窮海裔。折劍留贈人。嚴裝遂云邁。我行卽悠緲。及此還羈滯。曾非濟代謀。且有臨深誠。隨波混清濁。與物同醜麗。眇憶青巖棲。甯忘褐衣拜。自言偕水石。本欲親蘭蕙。何意薄松筠。翻然重管蒯。恆深取與分。孰慢平生契。款曲雞黍期。酸辛別離袂。逢時媿名節。遇坎悲淪替。適趙非解紛。遊燕獨無說。浩歌方振蕩。逸翮思凌勵。倏若異鵬搏。吾當學蟬蛻。

效古贈崔二

十月河洲時。一看有歸思。風颺生慘烈。雨雪暗天地。我輩今胡爲。浩哉述所至。緬懷當途者。濟濟居聲位。邈然在雲霄。甯肯更淪躓。周旋多燕樂。門館列車騎。美人芙蓉姿。狹室蘭麝氣。金爐陳獸炭。談笑正得意。豈論草澤中。有此枯槁士。我慙經濟策。久欲甘棄置。君負縱橫才。如何尙顛頓。長歌增鬱快。對酒不能醉。窮達自有時。夫子莫下淚。

鉅鹿贈李少府

李侯雖薄宦。時譽何籍籍。駿馬常借人。黃金每留客。投壺華館靜。縱酒涼風夕。卽此遇神仙。吾忻知損益。

酬司空璣

飄飄未得意。感激與誰論。昨日遇夫子。乃欣吾道存。江山滿詞賦。札翰起涼溫。吾見風雅作。人知德業尊。驚飈蕩萬木。秋氣屯高原。燕趙何蒼茫。鴻鴈來翩翩。此時與君別。攜手欲無言。

酬李少府

出塞魂猶驚。懷質意難說。誰知吾道間。乃在客中別。日夕捧瓊瑤。相思無休歇。伊人雖薄宦。舉代推高節。述作凌江山。聲華滿冰雪。一登薊邱上。四顧何慘烈。來雁無盡時。邊風正騷屑。將從崖谷遁。且與浮沈絕。君若登青雲。吾當投魏闕。

酬裴秀才

男兒貴得意。何必相知早。飄蕩與物永。蹉跎覺年老。長卿無產業。季子慙妻嫂。此事難重陳。未於衆人道。酬陸少府

朝臨淇水岸。還望衛人邑。別意在山阿。征途背原隰。稍稍前村口。唯見轉蓬入。水渚人去遲。霜天鴈飛急。固應不遠別。所與路未及。欲濟川上舟。相思空佇立。

寄孟五

秋風落窮巷。離憂兼暮蟬。後時已如此。高興亦徒然。知君念淹泊。憶我屢周旋。征路見來鴈。歸人悲遠天。平生感千里。相望在貞賢。

同觀陳十六史興碑并序

楚人陳章甫。繼毛詩而作史興碑。遠自周末。迨乎隋季。善惡不隱。蓋國風之流。未藏名山。刊在樂石。僕美其事。而賦是詩焉。

荆衡氣偏秀。江漢流不歇。此地多精靈。有時生才傑。伊人今獨步。逸思能間發。永懷掩風騷。千載常矻矻。新碑亦崔嵬。佳句懸日月。則是刊石經。終然繼檣杙。我來觀雅製。慷慨變毛髮。季主盡荒淫。前王徒貽厥。東周既削弱。兩漢更淪沒。西晉何披猖。五胡相唐突。作歌乃彰善。比物仍惡訐。感歎將謂誰。對之空咄咄。

宋中遇劉書記有別

何代無秀士。高門生此才。森然覩毛髮。若見江山來。幾載困常調。一朝時運催。白身謁明主。待詔登雲臺。相逢梁宋間。與我醉蒿萊。寒楚渺千里。雪天晝不開。末路終別離。不能強悲哀。男兒爭富貴。勸爾莫遲迴。

漣上題樊氏水亭

漣上非所趨。偶爲世務牽。經時駐歸棹。日夕對平川。莫論行子愁。且得主人賢。亭上酒初熟。廚中魚每鮮。自說宦游來。因之居住偏。煮鹽滄海曲。種稻長淮邊。四時長晏如。百口無飢年。菱芋藩籬下。漁樵耳目前。異縣少朋從。我行復速遄。向不逢此君。孤舟已言旋。明日又分首。風濤還渺然。

漣上別王秀才

飄飄經遠道。客思滿窮秋。浩蕩對長漣。君行殊未休。崎嶇山海側。想像無前儔。何意照乘珠。忽然欲暗投。東路方蕭條。楚歌復悲愁。暮帆使人感。去鳥兼離憂。行矣當自愛。壯年莫悠悠。余亦從此辭。異鄉難久留。贈言豈終極。慎勿滯滄洲。

觀李九少府翥樹宓子賤神祠碑

吾友吏茲邑。亦嘗懷宓公安。知夢寐間。忽與精靈通。一見興永歎。再來激深衷。賓從何逶迤。二十四老翁。於焉建層碑。突兀長林東。作者無愧色。行人感遺風。坐令高岸盡。獨對秋山空。片石勿謂輕。斯言固難窮。龍盤色絲外。鵲顧偃波中。形勝駐羣目。堅貞指蒼穹。我非王仲宣。去矣徒發蒙。

東平路中遇大水

天災自古昔。昏墊彌今秋。霖霖溢川原。瀕洞涵田疇。指塗適汶陽。掛席經蘆洲。永望齊魯效。白雲何悠悠。傍沿鉅野澤。大水縱橫流。蟲蛇擁獨樹。麋鹿奔行舟。稼穡隨波瀾。西成不可求。室居相枕籍。鼃黽聲啾啾。乃憐穴蟻漂。益羨雲禽游。農夫無倚著。野老生殷憂。聖主當深仁。廟堂運良籌。倉廩終爾給。田租應罷收。我心胡鬱陶。征旅亦悲愁。縱懷濟時策。誰肯論吾謀。

東平留贈狄司馬

古人無宿諾。茲道未爲難。萬里赴知己。一言誠可歎。馬蹄經月窟。劍術指樓蘭。地出北庭盡。城臨西海寒。森然瞻武庫。則是弄儒翰。入幕綰銀綬。乘軺兼鐵冠。練兵日精銳。殺敵無遺殘。獻捷見天子。論功俘可汗。激昂丹墀下。顧盼青雲端。誰謂縱橫策。翻爲權勢干。將軍旣坎壈。使者亦辛酸。耿介挹三事。羈離從一官。知君不得意。他日會鵬搏。

遇冲和先生

冲和生何代。或謂遊東溟。三命謁金殿。一言拜銀青。自云多方術。往往通神靈。萬乘親問道。六宮無敢聽。

昔云限霄漢。今來覩儀形。頭戴鷓鴣冠。手搖白鶴翎。終日飲醇酒。不醉復不醒。猶憶雞鳴山。每誦西昇經。拊背念離別。依然出戶庭。莫見今如此。曾爲一客星。

自淇涉黃河途中十二首

川上常極目。世情今已閒。去帆帶落日。征路隨長山。親友若雲霄。可望不可攀。於茲任所愜。浩蕩風波間。清晨泛中流。羽族滿汀渚。黃鵠何處來。昂藏寡儔侶。飛鳴無人見。飲啄豈得所。雲漢爾固知。胡爲不輕舉。野人頭盡白。與我忽相訪。手持青竹竿。日暮淇水上。雖老美容色。雖貧亦閑放。釣魚三十年。中心無所向。南登滑臺上。卻望河淇間。行樹夾流水。孤城對遠山。念茲川路闊。羨爾沙鷗閑。長想別離處。猶無音信還。東入黃河水。茫茫汎紆直。北望太行山。峨峨半天色。山河相映帶。深淺未可測。自昔有賢才。相逢不相識。秋日登滑臺。臺高秋已暮。獨行旣未愜。懷土悵無趣。晉宋何蕭條。羌胡散馳騖。當時無戰略。此地卽邊戍。兵革徒自勤。山河孰云固。乘閒喜臨眺。感物傷遊寓。惆悵落日前。飄颻遠帆處。北風吹萬里。南鴈不知數。歸意方浩然。雲沙更迴互。

亂流自茲遠。倚楫時一望。遙見楚漢城。崔嵬高山上。天道昔未測。人心無所向。屠釣稱侯王。龍蛇爭霸王。緬懷多殺戮。顧此增慘愴。聖代休甲兵。吾其得閑放。

茲川方悠邈。雲沙無前後。古堰對河壩。長林出淇口。獨行非吾意。東向日已久。憂來誰得知。且酌樽中酒。朝從北岸來。泊船南河澚。試共野人言。深覺農夫苦。去秋雖薄熟。今夏猶未雨。耕耘日勤勞。租稅兼寫鹵。

園蔬空寥落。產業不足數。尙有獻芹心。無因見明主。
茫茫濁河注。懷古臨河濱。禹功本豁達。漢迹方因循。坎德昔滂施。馮夷胡不仁。渤溈瀟陵隄。防東郡多悲辛。
天子忽驚悼。從官皆負薪。畚築豈無謀。祈禱如有神。宣房今安在。高岸空嶙峋。
我行倦風湍。輟棹將問津。空傳歌瓠子。感慨獨愁人。孟夏桑葉肥。穰陰夾長津。蠶農有時節。田野無閑人。
臨水狎魚樵。空山懷隱淪。誰能去京洛。顛顛對風塵。
朝景入平川。川長復垂柳。遙看魏公墓。突兀前山後。憶昔大業時。羣雄角奔走。伊人何電邁。獨立風塵首。
傳檄舉敖倉。擁兵屯洛口。連營一百萬。六合如可有。方項終比肩。亂隋將假手。力爭固難恃。驕戰曷能久。
若使學蕭曹。功名當不朽。

奉和儲光義

天靜終南高。俯映江水明。有若蓬萊下。淺深見澄瀛。羣峯懸中流。石壁如瑤瓊。魚龍隱蒼翠。鳥獸游清泠。
菰蒲林下秋。薜荔波中輕。山蔓浴蘭沚。水若居雲屏。嵐氣浮潛宮。孤光隨曜靈。陰陰豫章館。宛宛百花亭。
大君及羣臣。燕樂方嚶鳴。吾黨二三子。茲辰怡性情。逍遙滄洲時。乃在長安城。

塞下曲

結束浮雲駿。翩翩出從戎。且憑王子怒。復倚將軍雄。萬鼓雷殷地。千旗火生風。日輪駐霜戈。月魄絲瑠弓。
青海陣雲匝。黑山兵氣衝。戰酣太白高。戰罷旄頭空。萬里不惜死。一朝得成功。畫圖麒麟閣。入朝明光宮。

大笑向文士。一經何足窮。古人昧此道。往往成老翁。

三君詠并序

開元中。適游於魏郡。北有故太師鄭公舊館。里中有故尚書郭公遺業。邑外又有故太守狄公生祠焉。觀物增懷。遂爲三君詠。

魏鄭公

鄭公經綸日。隋民風塵昏。濟代取高位。逢時敢直言。道光先帝業。義激舊君恩。寂寞臥龍處。英靈千載魂。

郭代公

代公實英邁。津涯浩難識。擁兵抗矯徵。仗節歸有德。縱橫負才智。顧盼安社稷。流落勿重陳。懷哉爲悽惻。

狄梁公

梁公乃貞固。勳烈垂竹帛。昌言太后朝。潛運儲君策。待賢開相府。共理登方伯。至今青雲人。猶是門下客。

東平路作三首

南圖適不就。東走豈吾心。索索涼風動。行行秋水深。蟬鳴木葉落。茲夕更秋霖。明時好畫策。動欲干王公。今日無成事。依依親老農。扁舟向何處。吾愛汶陽中。清曠涼夜月。徘徊孤客舟。渺然風波上。獨夢前山秋。秋至復搖落。空令行者愁。

銅雀妓

日暮銅雀迴秋深。玉座清蕭森。松柏望委鬱。綺羅情君恩不再得。妾舞爲誰輕。

同諸公登慈恩寺浮圖

香界泯羣有。浮圖豈諸相。登臨駭孤高。披拂忻大壯。言是羽翼生。迴出虛空上。頓疑身世別。乃覺形神王。宮闕皆戶前。山河盡簷向。秋風昨夜至。秦塞多清曠。千里何蒼蒼。五陵鬱相望。盛時慙阮步。末宦知周防。輸效獨無因。斯焉可遊放。

和賀蘭判官望北海作

聖代務平典。輜軒推上才。迢遙溟海際。曠望滄波開。四牡未遑息。三山安在哉。巨鼇不可釣。高浪何崔嵬。湛湛朝百谷。茫茫連九垓。挹流納廣大。觀異增遲迴。日出見魚目。月圓知蚌胎。迹非想像到。心以精靈猜。遠色帶孤嶼。虛聲涵殷雷。風行越裳貢。水過天吳災。攬轡準將擊。忘機鷗復來。緣情韻騷雅。獨立遺塵埃。吏道竟殊用。翰林仍忝陪。長鳴謝知己。所媿非龍媒。

奉陪北海李太守丈人夏日平陰亭

天子股肱守。丈人山岳靈。出身侍丹墀。舉翮凌青冥。當昔皇運否。人神俱未寧。諫官莫敢議。酷吏方專刑。谷永獨言事。匡衡多引經。兩朝納深衷。萬乘無不聽。盛烈播南史。雄詞豁東溟。誰謂整隼旟。翻然憶柴扃。寄書汶陽客。迴首平陰亭。開封見千里。結念存百齡。隱軫江山麗。氛氳蘭茝馨。自憐遇時休。漂泊隨流萍。春野變木德。夏天臨火星。一生徒羨魚。四十猶聚螢。從此日閑放。焉能懷拾青。

塞上

東出盧龍塞。浩然客思孤。亭堠列萬里。漢兵猶備胡。邊塵滿北溟。虜騎正南驅。轉鬪豈長策。和親非遠圖。惟昔李將軍。按節臨此都。搃戎掃大漠。一戰擒單于。常懷感激心。願效縱橫謨。倚劍欲誰語。關河空鬱紆。平生重離別。感激對孤琴。

贈別沈四逸人

遇盧明府有贈

沈侯未可測。其況信浮沈。十載常獨坐。幾人知此心。乘舟蹈滄海。買劍投黃金。世務不足煩。有田西山岑。我來遇知己。遂得開清襟。何意閩閩間。沛然江海深。疾風掃秋樹。濮上多鳴砧。耿耿尊酒前。聯鴈飛愁音。良吏不易得。古人今可傳。靜默本諸己。以此知其賢。我行挹高風。羨爾兼少年。胸懷豁清夜。史漢如流泉。明日復行春。逶迤出郊壇。登高見百里。桑野鬱芊芊。時平俯鵲巢。歲熟多人煙。奸猾唯閉戶。逃亡歸種田。迴軒自郭南。老幼滿馬前。皆賀蠶農至。而無徭役牽。君觀黎庶心。撫之誠萬全。何幸逢大道。願言烹小鮮。誰能奏明主。一試武城絃。

題尉遲將軍新廟

周室既版蕩。賊臣立嬰兒。將軍獨激昂。誓欲酬恩私。孤城日無援。高節終可悲。家國共淪亡。精魂空在斯。沈沈積冤氣。寂寂無人知。良牧懷深仁。與君建明祠。父子俱血食。軒車每逶迤。我來薦蘋蘩。感歎興此詞。

晨光上階闥。殺氣翻旌旗。明明幽冥理。至誠信莫欺。唯夫二千石。多慶方自茲。

單父逢鄧司倉覆倉庫因而有贈

邦牧今坐嘯。羣賢趨紀綱。四人忽不擾。耕者遙相望。粲粲府中妙。授詞如履霜。炎炎伏熱時。草木無晶光。匹馬度睢水。清風何激揚。校緝閱帑藏。發廩忻斯箱。邂逅得相逢。歡言至夕陽。開襟自公餘。載酒登琴堂。舉杯挹山川。寓目窮毫芒。白鳥向田盡。青蟬歸路長。醉中不惜別。況乃正遊梁。

同韓四薛三東亭翫月

遠遊悵不樂。茲賞吾道存。款曲故人意。辛勤清夜言。東庭何寥寥。佳景無朝昏。堦墀近洲渚。戶牖當郊原。矧乃窮周旋。游時怡討論。樹陰蕩瑤瑟。月氣延清樽。明河帶飛鴈。野火連荒村。對此更愁予。悠哉懷故園。

同敬八盧五汎河間清河

清川在城下。沿汎多所宜。同濟愜數公。翫物欣良時。飄颻波上興。燕婉舟中詞。昔涉乃平原。今來忽漣漪。東流達滄海。西流延滹池。雲樹共晦明。井邑相逶迤。稍隨歸月帆。若與沙鷗期。漁父更留我。前潭水未滋。同房侍御山園新亭與邢判官同遊

隱隱春城外。蒙龍陳迹深。君子顧榛莽。與言傷古今。決河導新流。疏逕縱舊林。開亭俯川陸。時景宜招尋。肅穆逢使軒。夤緣事登臨。忝遊芝蘭室。還對桃李陰。岸遠白波來。氣喧黃鳥吟。因覩歌頌作。始知經濟心。灌壇有遺風。單父多鳴琴。誰爲久州縣。蒼生懷德音。

同馬太守聽九思法師講金剛經

吾師晉陽寶傑出山河。最途經世諦間。心到空王外。鳴鐘山虎伏。說法天龍會。了義同建瓴。梵法若吹籟。深知億劫苦。善喻恆沙大。捨施割肌膚。攀緣去親愛。招提河清淨。良牧駐軒蓋。露冕衆香中。臨人覺苑內。心持佛印久。標割魔軍退。願開初地因。永奉彌天對。

送韓九

惆悵別離日。徘徊岐路前。歸人望獨樹。匹馬隨秋蟬。常與天下士。許君兄弟賢。良時正可用。行矣莫徒然。

登子賤琴堂賦詩三首并序

甲申歲適登子賤琴堂賦詩三首。首章懷宓公之德。千祀不朽。次章美太守李公能嗣子賤之政。再造琴臺。末章多邑宰崔公能思子賤之理。

宓子昔爲政。鳴琴登此臺。琴和人亦閑。千載稱其才。臨眺忽悽愴。人琴安在哉。悠悠此天壤。唯有頌聲來。邦伯感遺事。慨然建琴堂。乃知靜者心。千載猶相望。入室想其人。出門何茫茫。唯見白雲合。東臨鄒魯鄉。皤皤邑中老。自誇邑中理。何必升君堂。然後知君美。開門無犬吠。早臥常晏起。昔人不忍欺。今我還復爾。

同薛司直秋霽曲江俯見南山作

南山鬱初霽。曲江湛不流。若臨瑤池間。想望崑崙邱。迴首見黛色。眇然波上秋。深沈俯崢嶸。清淺延阻修。連潭萬木影。插岸千巖幽。杳靄信難測。淵淪無暗投。片雲對漁父。獨鳥隨虛舟。我心寄青霞。世事慙白鷗。

得意在乘興。忘懷非外求。良辰自多暇。忻與數子遊。

魯西至東平

沙岸泊不定。石橋水橫流。問津見魯谷。懷古傷家邱。寥落千載後。空傳褻聖侯。

淇上別劉少府子英

近來住淇上。蕭條惟空林。又非耕種時。閑散多自任。伊君獨知我。驅馬欲招尋。千里忽攜手。十年同苦心。求仁見交態。於道喜甘臨。逸思乃天縱。微才應陸沈。飄然歸故鄉。不復問離襟。南登黎陽度。莽蒼寒雲陰。桑葉原上起。河凌山下深。窮途更遠別。相對益悲吟。

別耿都尉

四十能學劍。時人無此心。如何耿夫子。感激投知音。翩翩白馬來。二月青草深。別易小千里。興酣傾百金。宋中遇林慮楊十七山人因而有別

昔余涉漳水。驅車行鄴西。遙見林慮山。蒼蒼憂天倪。邂逅逢爾曹。說君彼巖棲。蘿徑垂野蔓。石房倚雲梯。秋韭何青青。藥苗數百畦。栗林隘谷口。栝樹森迴溪。耕耘有山田。紡績有山妻。人生苟如此。何必組與珪。誰謂遠相訪。曩情殊不迷。簷前舉醇醪。竈下烹隻雞。朔風忽振蕩。昨夜寒蟬啼。遊子益思歸。罷琴傷解攜。出門盡原野。白日黯已低。始驚道路難。終念言笑睽。因聲謝岑壑。歲暮一攀躋。

苦雨寄房四昆季

獨坐見多雨。況茲兼索居。茫茫十月郊。窮陰千里餘。彌望無端倪。北風擊林筵。白日眇難覩。黃雲爭卷舒。安得造化功。曠然一掃除。滴瀝簷宇愁。寥寥談笑疎。泥塗擁城郭。水潦盤邱墟。惆悵憫田農。徘徊傷里閭。曾是力井稅。曷爲無斗儲。萬事切中懷。十年思上書。君門嗟緬邈。身計念居諸。沈吟顧草茅。鬱快任盈虛。黃鵠不可羨。鳴雞時起予。故人平臺側。高館臨通渠。兄弟方荀陳。才華冠應徐。彈碁自多暇。飲酒更何如。知人想林宗。直道慙史魚。攜手流風在。開襟鄙吝祛。甯能訪窮巷。相與對園蔬。

別張少府

歸客留不住。朝雲縱復橫。馬頭向春草。斗柄臨高城。嗟我久離別。羨君看弟兄。歸心更難道。回首一傷情。

酬馬八效古見贈

深崖生綠竹。秀色徒氛氳。時代種桃李。無人顧此君。柰何冰雪操。尙與蒿萊羣。願託靈仙子。一吹聲入雲。

送崔錄事赴宣城

大國非不理。小官皆用才。欲行宣城印。住飲落陽杯。晚景爲人別。長天無鳥迴。舉帆風波渺。倚棹江山來。羨爾兼乘興。蕪湖千里開。

宋中別李八

歲晏誰不歸。君歸意可說。將趨倚門望。還念同人別。駐馬臨長亭。飄然事明發。蒼茫眺千里。正值苦寒節。舊國多轉蓬。平臺下明月。世情薄疵賤。夫子懷賢哲。行矣各勉旃。吾當挹餘烈。

宋中別周梁李三子

曾是不得意。適來兼別離。如何一樽酒。翻作滿堂悲。周子負高價。梁生多逸詞。周旋梁宋間。感激建安時。白雪正如此。青雲無自疑。李侯懷英雄。骯髒乃天資。方寸且無間。衣冠當在斯。俱爲千里遊。勿念兩鄉辭。且見壯心在。莫嗟攜手遲。涼風吹北原。落日滿西陂。露下草初白。天長雲屢滋。我心不可得。君兮定何之。京洛多知己。誰能憶左思。

酬別薛三蔡大留簡韓十四主簿

迢遞辭京華。辛勤異鄉縣。登高俯滄海。迴首淚如霰。同人久離別。失路還相見。薛侯懷直道。德業應時選。蔡子負清才。當年擢賓薦。韓公有奇節。詞賦凌羣彥。讀書嵩岑間。作吏滄海甸。伊余寡棲託。感激多慍見。縱誕非爾情。漂淪任疵賤。忽枉瓊瑤作。乃深平生眷。始謂吾道存。終嗟客遊倦。歸心無晝夜。別事除言宴。復值涼風時。蒼茫夏雲變。

薊門不遇王之渙郭密之因以留贈

適遠登薊邱。茲晨獨搔屑。賢交不可見。吾願終難說。迢遞千里遊。羈離十年別。才華仰清興。功業嗟芳節。曠蕩阻雲海。蕭條帶風雪。逢時事多繆。失路心彌折。行矣勿重陳。懷君但愁絕。

送虞城劉明府謁魏郡苗太守

天官蒼生望。出入承明廬。肅肅領舊藩。皇皇降璽書。茂宰多感激。良將復吹噓。未懷一言合。誰謂千里疎。

對酒忽命駕。茲情何起予。炎天晝如火。極目無行車。長路出雷澤。浮雲歸孟諸。魏郡十萬家。歌鍾喧里閭。傳道賢君至。閉關常晏如。君將挹高論。定是問樵漁。今日逢明聖。吾爲陶隱居。

酬祕書弟兼寄幕下諸公并序

乙亥歲適徵詣長安。時御史楊公任通事舍人。詩書起予。蓋終日矣。今年適自封邱尉統吏卒於青夷。途經博陵。得太守賈公之政。相見如舊。他日之意存焉。司業張侯周旋迨茲。僅三十載。將疇昔是好。匪窮達之異乎。族弟祕書鴈序之白眉者。風塵一別。俱東西南北之人。愴然相逢。適與願契。旅館之暇。長懷益增。因賦是詩。愧非六義之流也。

亞相膺時傑。羣才遇良工。翩翩幕下來。拜賜甘泉宮。信知命世奇。適會非常功。侍御執邦憲。清詞煥春叢。末路望繡衣。他時常發蒙。孰云三軍壯。懼我彈射雄。誰謂萬里遙。在我樽俎中。光祿經濟器。精微自深衷。前席屢榮問。長城兼在躬。高縱激頽波。逸翮馳蒼穹。將副節制籌。欲令沙漠空。司業志應徐。雅度思沖融。相思三十年。憶昨猶兒童。今來抱青紫。忽若披鷓鴣。說劍增慷慨。論交持始終。祕書卽吾門。虛白無不通。多才陸平原。碩學鄭司農。獻封到關西。獨步歸山東。永意久知處。嘉言能亢宗。客從梁宋來。行役隨轉蓬。酬贈欣元弟。憶賢瞻數公。遊鱗戲滄浪。鳴鳳棲梧桐。並負垂天翼。俱乘破浪風。眈眈天府間。偃仰誰敢同。何意搆廣廈。翻然顧雕蟲。應知阮步兵。惆悵此途窮。

淇上酬薛三掾兼寄郭少府

自從別京華。我心乃蕭索。十年守章句。萬事空寥落。北上登薊門。茫茫見沙漠。倚劍對風塵。慨然思衛霍。拂衣去燕趙。驅馬悵不樂。天長滄洲路。日暮邯鄲郭。酒肆或淹留。漁潭屢棲泊。獨行備艱險。所見窮善惡。永願拯芻蕘。孰云干鼎鑊。皇情念淳古。時俗何浮薄。理道資任賢。安人在求瘼。故交負靈奇。逸氣抱謇諤。隱軫經濟具。縱橫建安作。才望忽先鳴。風期無宿諾。飄飄勞州縣。迢遞限言謔。東馳眇貝邱。西顧彌虢略。淇水徒自流。浮雲不堪託。吾謀適可用。天路豈寥廓。不然買山田。一身與耕鑿。且欲同鷓鴣。焉能志鴻鶴。

酬岑二十主簿秋夜見贈之作

舍下蛩亂鳴。居然自蕭索。緬懷高秋興。忽枉清夜作。感物我心勞。涼風驚二毛。池空菡萏死。月出梧桐高。如何異鄉縣。復得交才彥。汨沒嗟後時。蹉跎恥相見。箕山別來久。魏闕誰不戀。獨有江海心。悠悠未嘗倦。

苦雪四首

二月猶北風。天陰雪冥冥。寥落一室中。悵然慙百齡。苦愁正如此。門柳復青青。惠連發清興。袁安念高臥。余故非斯人。爲性兼懶惰。賴茲樽中酒。終日聊自過。濛濛灑平陸。淅瀝至幽居。且喜潤羣物。焉能悲斗儲。故交久不見。烏雀投吾廬。孰云久閒曠。本自保知寡。窮巷獨無成。春條祗盈把。安能羨鵬舉。且欲歌牛下。乃知古時人。亦有如我者。

登廣陵樓靈寺塔

淮南富登臨。茲塔信奇最。直上造雲族。憑虛納天籟。迥然碧海西。獨立飛鳥外。始知高興盡。適與賞心會。

連山黯吳門。喬木吞楚塞。城池滿牕下。物象歸掌內。遠思駐江帆。暮情結春靄。軒車疑蠢動。造化資大塊。何必了無身。然後知所退。

魯郡途中遇徐十八錄事

誰謂蒿穎客。遂經鄒魯鄉。前臨少昊墟。始覺東蒙長。獨立豈吾心。懷古激中腸。聖人久已矣。游夏遙相望。徘徊野澤間。左右多悲傷。日出見闕里。川平如汶陽。弱冠負高節。十年思自強。終年不得意。去去任行藏。

酬鴻臚裘主簿雨後睢陽北樓見贈之作

暮霞照新晴。歸雲猶相逐。有懷晨昏暇。想見登眺目。問禮侍彤襜。題詩訪茅屋。高樓多古今。陳事滿陵谷。地久微子封。臺餘孝王築。徘徊顧霄漢。豁達俯川陸。遠水對秋城。長天向喬木。公門何清淨。列戟森已肅。不歎攜手稀。恆思著鞭速。終當拂羽翰。輕舉隨鴻鵠。

薊門五首

薊門逢古老。獨立思氛氲。一身既零丁。頭鬢白紛紛。勳庸今已矣。不識霍將軍。漢家能用武。開拓窮異域。戍卒厭糟糠。降胡飽衣食。關亭試一望。吾欲涕沾臆。邊城十一月。雨雪亂霏霏。元戎號令嚴。人馬亦輕肥。羌胡無盡日。征戰幾時歸。幽州多騎射。結髮重橫行。一朝事將軍。出入有聲名。紛紛獵秋草。相向角弓鳴。黯黯長城外。日沒更煙塵。胡騎雖憑陵。漢兵不顧身。古樹滿空塞。黃雲愁殺人。

同羣公宿開善寺贈陳十六所居

駕車出人境。避暑投僧家。徘徊龍象側。始見香林花。讀書不及經。飲酒不勝茶。知君悟此道。所未披袈裟。談空忘外物。持戒破諸邪。則是無心地。相看唯月華。

同羣公秋登琴臺

古迹使人感。琴臺空寂寥。靜然顧遺塵。千載如昨朝。臨眺自茲始。羣賢久相邀。德與形神高。孰知天地遙。四時何倏忽。六月鳴秋蜩。萬象歸白帝。平川橫赤霄。猶是對夏伏。幾時有涼颿。燕雀滿簷楹。鴻鵠搏扶搖。物性各自得。我心在漁樵。兀然還復醉。尙握樽中瓢。

同羣公出獵海上

畋獵自古昔。況伊心償俱。偶與羣公遊。曠然出平蕪。層陰漲溟海。殺氣窮幽都。鴈隼何翩翩。馳聚相傳呼。豺狼竄榛莽。麋鹿罹艱虞。高鳥下駢弓。困獸鬪匹夫。塵驚大澤晦。火燎深林枯。失之有餘恨。獲者無全軀。咄彼工拙間。恨非指蹤徒。猶懷老氏訓。感歎此歡娛。

同羣公題鄭少府田家

鄭侯應恓惶。五十頭盡白。昔爲南昌尉。今作東郡客。與語多遠情。論心知所益。秋林旣清曠。窮巷空淅瀝。蝶舞園更閉。雞鳴日云夕。男兒未稱意。其道固無適。勸君且杜門。勿歎人事隔。

同羣公題中山寺

平原十里外。稍稍雲巖深。遂及清淨所。都無人世心。名僧既禮謁。高閣復登臨。石壁倚松徑。山田多栗林。迢遙盡巘嶸。逼側仍嶮嶽。吾欲休世事。於焉聊自任。

李雲南征蠻詩并序

天寶十一載。有詔伐西南夷。右相楊公兼節制之寄。乃奏前雲南大守李宓涉海自交趾擊之。道路險艱。往復數萬里。蓋百王所未通也。十二載四月。至於長安。君子是以知廟堂使能。而李公效節。適忝斯人之舊。因賦是詩。

聖人赫斯怒。詔伐西南戎。肅穆廟堂上。深沈節制雄。遂令感激士。得建非常功。料死不料敵。顧恩甯顧終。鼓行天海外。轉戰蠻夷中。梯巘近高鳥。穿林經毒蟲。鬼門無歸客。北戶多南風。蜂虿隔萬里。雲雷隨九攻。長驅大浪破。急擊羣山空。餉道忽已遠。縣軍垂欲窮。精誠動白日。憤薄連蒼穹。野食掘田鼠。晡殮兼燹僮。收兵列亭堠。拓地彌西東。臨事恥苟免。履危能飭躬。將星獨照耀。邊色何溟濛。瀘水夜可涉。交州今始通。歸來長安道。召見甘泉宮。廉藺若未死。孫吳知暗同。相逢論意氣。慷慨謝深衷。

登百丈峯二首

朝登百丈峯。遙望燕支道。漢壘青冥間。胡天白如掃。憶昔霍將軍。連年此征討。匈奴終不滅。寒山徒草草。唯見鴻鴈飛。令人傷懷抱。

晉武輕後事。惠皇終已昏。豺狼塞瀟洛。胡羯爭乾坤。四海如鼎沸。五原徒自尊。而今白庭路。猶對青陽門。

朝市不足問君臣隨草根

酬裴員外以詩代書

凡三百四十六字

少時方浩蕩。遇物猶塵埃。脫略身外事。交遊天下才。單車入燕趙。獨立心悠哉。甯知戎馬間。忽展平生懷。且欣清論高。豈顧夕陽頽。題詩碣石館。縱酒燕王臺。北望沙漠垂。漫天雲皚皚。臨邊無策略。覽古空徘徊。樂毅吾所憐。拔齊口見猜。荆卿吾所悲。適秦不復迴。然諾多死地。公忠誠禍胎。與君從此辭。每恐流年催。如何俱老大。始復忘形骸。兄弟真二陸。聲華連八裴。乙未將星變。賊臣候天災。胡騎犯龍山。乘輿經馬嵬。千官無倚著。萬姓徒悲哀。誅呂鬼神動。安劉天地開。奔波走風塵。倏忽值雲雷。擁旄出淮甸。入幕徵楚材。誓當剪鯨鯢。永以竭鯨駘。小人胡不仁。讒我成死灰。賴得日月明。照耀無不該。留司洛陽宮。詹府唯蒿萊。是時掃氛祲。尙未殲渠魁。背河列長圍。師老將亦乖。歸軍劇風火。散卒爭椎埋。一夕灑洛空。生靈悲暴颶。衣冠投草莽。予欲馳江淮。登頓宛葉下。栖遑襄鄧隈。城池何蕭條。邑屋更崩摧。縱橫荆棘叢。但見瓦礫堆。行人無血色。戰骨多青苔。遂除彭門守。因得朝玉階。激昂仰鴛鴦。獻替欣鹽梅。驅傳及遠蕃。憂思鬱難排。罷人紛爭訟。賦稅如山崖。所思在畿甸。曾是魯宓儕。自從拜郎官。列宿煥天街。那能訪遐僻。還復寄瓊瓌。金玉本高價。壘篋終易諧。郎詠臨清秋。涼風下庭槐。何意寇盜間。獨稱名義偕。辛酸陳侯誅。歎息季鷹杯。白日屢分手。青春不再來。臥看中散論。愁憶太常齋。酬贈徒爲爾。長歌還自吟。

酬龐十兵曹

憶昔遊京華。自言生羽翼。懷書訪知己。末路空相識。許國不成名。還家有慚色。託身從吠畝。浪迹初自得。雨澤感天時。耕耘忘帝力。同人洛陽至。問我睢水北。遂爾款津涯。淨然見胸臆。高談懸物象。逸韻投翰墨。別岸迥無垠。海鶴鳴不息。梁城多古意。攜手共悽惻。懷賢想鄒枚。登高思荆棘。世情惡疵賤。之子憐孤直。酬贈感并深。離憂豈終極。

和崔二少府登楚邱城作

故人亦不遇。異縣久棲託。辛勤失路意。感歎登樓作。清晨眺原野。獨立窮寥廓。雲散芒碭山。水還睢陽郭。遶梁卽襟帶。封衛多漂泊。事古悲城池。年豐愛墟落。相逢俱未展。攜手空蕭索。何意千里心。仍求百金諾。公侯皆我輩。動用在謀略。聖心思賢才。竭來刈葵藿。

同呂員外酬田著作幕門軍西宿盤山秋夜作

磧路天正秋。邊城夜應永。遙傳戎旅作。已報關山冷。上將頓盤坂。諸軍徧泉井。綢繆闔外書。慷慨幕中請。能使勳業高。動令氛霧屏。遠途能自致。短步終難騁。羽翮時一看。窮愁始三省。人生感然諾。何啻若形影。白髮知苦心。陽春見佳境。星河連塞絡。刁斗兼山靜。憶君霜露時。使我空引領。

哭裴少府

世人誰不死。嗟君非生慮。扶病適到官。田園在何處。公才羣吏感。棄事他人助。余亦未識君。深悲哭君去。

七言古詩

燕歌行并序

開元三十六年。客有從元戎出塞而還者。作燕歌行以示。適感征戍之事。因而和焉。
漢家煙塵在東北。漢將辭家破殘賊。男兒本自重橫行。天子非常賜顏色。攬金伐鼓下榆關。旌旆逶迤碣石間。校尉羽書飛瀚海。單于獵火照狼山。山川蕭條極邊土。胡騎憑陵雜風雨。戰士軍前半死生。美人帳下猶歌舞。大漠窮秋塞草腓。孤城落日鬪兵稀。身當恩遇常輕敵。力盡關山未解圍。鐵衣遠戍辛勤久。玉筯應啼別離後。少婦城南欲斷腸。征人薊北空回首。邊庭飄颻那可度。絕域蒼茫無所有。殺氣三時作陣雲。寒聲一夜傳刁斗。相看白刃血紛紛。死節從來豈顧勳。君不見沙場征戰苦。至今猶憶李將軍。

行路難二首

長安少年不少錢。能騎駿馬鳴金鞭。五侯相逢大道邊。美人絃管爭留連。黃金如斗不敢惜。片言如山莫棄捐。安知顛頓讀書者。暮宿靈臺私自憐。

君不見富家翁。舊時貧賤誰比數。一朝金多結豪貴。百事勝人健如虎。子孫成行滿眼前。妻能管絃妾歌舞。自矜一身忽如此。卻笑旁人獨愁苦。東鄰少年安所如。席門窮巷出無車。有才不肯學干謁。何用年年空讀書。

別韋叅軍

二十解書劍。西遊長安城。舉頭望君門。屈指取公卿。國風沖融邁三五。朝廷歡樂彌寰宇。白璧皆言賜近

臣布衣不得干明主。歸來洛陽無負郭。東過梁宋非吾土。兔苑爲農歲不登。鴈池垂釣心長苦。世人向我同衆人。唯君於我最相親。且喜百年有交態。未嘗一日辭家貧。彈碁擊筑白日晚。縱酒高歌楊柳春。歡娛未盡分散去。使我惆悵驚心神。丈夫不作兒女別。臨岐涕淚沾衣巾。

送蔡山人

東山布衣明古今。自言獨未逢知音。識者閱見一生事。到處豁然千里心。看書學劍長辛苦。近日方思謁明主。斗酒相留醉復醒。悲歌數年淚如雨。丈夫遭遇不可知。買臣主父皆如斯。我今蹭蹬無所似。看爾崩騰何若爲。

漁父歌

曲岸深潭一山叟。駐眼看釣不移手。世人欲得知姓名。良久問他不開口。箬皮笠子荷葉衣。心無所營守釣磯。料得孤舟無定止。日暮持竿何處歸。

秋胡行

妾本邯鄲未嫁時。容華倚翠人未知。一朝結髮從君子。將妾迢迢東路陲。時逢大道無艱阻。君方遊宦從陳汝。蕙樓獨臥頻度春。彩落辭君幾徂暑。三月垂楊蠶未眠。攜籠結侶南陌邊。道逢行子不相識。贈妾黃金買少年。妾家夫婿經離久。寸心誓與長相守。願言行路莫多情。道妾貞心在人口。日暮蠶饑相命歸。攜籠端飾來庭闈。勞心苦力終無恨。所冀君恩那可依。聞說行人已歸止。乃是向來贈金子。相看顏色不復

言相顧懷慙有何已。從來自隱無疑背。真爲君情也相會。如何咫尺仍有情。況復迢迢千里外。誓將顧恩不顧身。念君此日赴河津。莫道向來不得意。故欲留規誡後人。

留別鄭三韋九兼洛下諸公

憶昨相逢論久要。顧君哂我輕常調。羈旅雖同白社遊。詩書已作青雲料。蹇躓蹉跎竟不成。年過四十尙躬耕。長歌達者懷中物。大笑前人身後名。幸逢明盛多招隱。高山大澤徵求盡。此時亦得辭漁樵。青袍裹身荷聖朝。犁牛釣竿不復見。縣人邑吏來相邀。遠路鳴蟬秋興發。華堂美酒離憂銷。不知何時更攜手。應念茲晨去折腰。

封邱縣

我本漁樵孟諸野。一生自是悠悠者。乍可狂歌草澤中。甯堪作吏風塵下。祇言小邑無所爲。公門百事皆有期。拜迎官長心欲碎。鞭撻黎庶令人悲。歸來向家問妻子。舉家盡笑今如此。生事應須南畝田。世情付與東流水。夢想舊山安在哉。爲銜君命日遲迴。乃知梅福徒爲爾。轉憶陶潛歸去來。

題李別駕壁

去鄉不遠逢知己。握手相歡得如此。禮樂遙傳魯伯禽。賓客爭過魏公子。酒筵莫散明月上。櫪馬常鳴春風起。一生稱意能幾人。今日從君問終始。

邯鄲少年行

邯鄲城南游俠子。自矜生長邯鄲裏。千場縱博家仍富。幾處報讎身不死。宅中歌笑日紛紛。門外車馬如雲屯。未知肝膽向誰是。令人卻憶平原君。不見今人交態薄。黃金用盡還疎索。以茲感歎辭舊遊。更於時事無所求。且與少年飲美酒。往來射獵西山頭。

古大梁行

古城莽蒼饒荆榛。驅馬荒城愁殺人。魏王宮觀盡禾黍。信陵賓客隨灰塵。憶昨雄都舊朝市。軒車照耀歌鍾起。軍容帶甲三十萬。國步連營五千里。全盛須臾那可論。高臺曲池無復存。遺墟但見狐狸迹。古地空餘草木根。暮天搖落傷懷抱。撫劍悲歌對秋草。俠客猶傳朱亥名。行人尙識夷門道。白壁黃金萬戶侯。寶刀駿馬填山邱。年代淒涼不可問。往來唯見水東流。

別楊山人

不到蒿陽動十年。舊時心事已徒然。一二故人不復見。三十六峯猶眼前。夷門二月柳條色。流鶯數聲淚沾臆。鑿井耕田不我招。知君以此忘帝力。山人好去蒿陽路。惟余眷眷長相憶。

送田少府貶蒼梧

沈吟對遷客。惆悵西南天。昔爲一官未得意。今向萬里令人憐。念茲斗酒成睽間。停舟歎君日將晏。遠樹應連北地春。行人卻羨南歸鴈。丈夫窮達未可知。看君不合長數奇。江山到處堪乘興。楊柳青青那足悲。

別李景參

離心忽悵然。策馬對秋天。孟諸薄暮涼。風起歸客相逢渡。睢水昨時攜手已十年。今日分途各千里。歲物蕭條滿路岐。此行浩蕩令人悲。家貧羨爾有微祿。欲往從之何所之。

送郭處士往萊蕪兼寄苟山人

君爲東蒙客。往來東蒙畔。雲臥臨嶧陽。山行窮日觀。少年詞賦皆可聽。秀眉白面風清冷。身上未曾染名利。口中獨未知羶腥。今日還山意無極。豈辭世路多相識。歸見萊蕪九十翁。爲論別後長相憶。

同李九士曹觀壁畫雲作

始知帝鄉客。能畫蒼梧雲。秋天萬里一片色。只疑飛盡猶氛氲。

送別

昨夜離心正鬱陶。三更白露西風高。螢飛木落何淅瀝。此時夢見西歸客。曙鐘寥亮三四聲。東鄰嘶馬使人驚。攬衣出戶一相送。唯見歸雲縱復橫。

崔司錄宅燕大理李卿

多雨殊未已。秋雲更沈沈。洛陽故人初解印。山東小吏來相尋。上卿才大名不朽。早朝至尊暮求友。豁達常推海內賢。殷勤但酌樽中酒。飲醉欲言歸剡溪。門前駟馬光照衣。路旁觀者徒唧唧。我公不以爲是非。

畫馬篇

君侯櫜上驄。貌在丹青中。馬毛連錢蹄鐵色。圖畫光輝驕玉勒。馬行不動勢若來。權奇蹴踏無塵埃。感茲

絕代稱妙手。遂令談者不容口。麒麟獨步自可珍。鴛駘萬匹知何有。終未如他歷上驄。載華轂。騁飛鴻。荷君剪拂與君用。一日千里如旋風。

詠馬鞭

龍竹養根凡幾年。工人截之爲長鞭。一節一目皆天然。珠重重。星連連。繞指柔。純金堅。繩不直。規不圓。把向空中捎一聲。良馬有心日馳千。

贈別晉三處士

有人家住清河源。渡河問我遊梁園。手持道經注已畢。心知內篇口不言。盧門十年見秋草。此心惆悵誰能道。知己從來不易知。慕君爲人與君好。別時九月桑葉疎。出門千里無行車。愛君且欲君先達。今上求賢早上書。

九月九日酬顏少府

簷前白日應可惜。籬下黃花爲誰有。行子迎霜未授衣。主人得錢始沽酒。蘇秦顛顛人多厭。蔡澤棲遲世看醜。縱使登高只斷腸。不如獨坐空搔首。

賦得還山吟送沈四山人

還山吟天高。日暮寒山深。送君還山識君心。人生老大須恣意。看君解作一生事。山間偃仰無不至。石泉淙淙若風雨。桂花松子常滿地。賣藥囊中應有錢。還山服藥又長年。白雲勸盡杯中物。明月相隨何處眠。

眠時憶問醒時意。夢魂可以相周旋。

見人臂蒼鷹

寒楚十二月。蒼鷹八九毛。寄言燕雀莫相忌。自有雲霄萬里高。

古歌行

君不見漢家三葉從代至。高皇舊臣多富貴。天子垂衣方晏如。廟堂拱手無餘議。蒼生偃臥休征戰。露臺
百金以爲費。田舍老翁不出門。洛陽少年莫論事。

同鮮于洛陽於畢員外宅觀畫馬歌

知君愛鳴琴。仍好千里馬。永日恆思單父中。有時心到宛城下。遇客丹青天下才。白生胡雛控龍媒。主人
娛賓畫障開。只言騏驥西極來。半壁趨勢不住。滿堂風飄颯然度。家僮愕視欲先鞭。櫪馬驚嘶還屢顧。
始知物妙皆可憐。燕昭市駿豈徒然。縱令翦拂無所用。猶勝鴛駘在眼前。

送渾將軍出塞

將軍族貴兵且強。漢家已是渾耶王。子孫相承在朝野。至今部曲燕支下。控弦盡用陰山兒。登陣常騎大
宛馬。銀鞍玉勒繡螭弧。每逐嫖姚破骨都。李廣從來將將士。衛青未肯學孫吳。傳有沙場千萬騎。昨日邊
庭羽書至。城頭畫角三四聲。匣裏寶刀晝夜鳴。意氣能甘萬里去。辛勤動作一年行。黃雲白草無前後。朝
建旌旗夕刁斗。塞下應多俠少年。關西不見春楊柳。從軍借問所從誰。擊劍酣歌當此時。遠別無輕繞朝

策平戎早寄仲宣詩。

同河南李少尹畢員外宅夜飲時洛陽告捷遂作春酒歌

故人美酒勝濁醪。故人清詞合風騷。長歌滿酌惟吾曹。高談正可揮塵毛。半醉忽然持蟹螯。洛陽告捷傾前後。武侯腰間印如斗。郎官無事時飲酒。杯中綠蟻吹轉來。甕上飛花拂還有。前年持節將楚兵。去年留司在東京。今年復拜二千石。盛夏五月西南行。彭門劍門蜀山裏。昨逢軍人劫奪我。到家但見妻與子。頗得飲君春酒數十杯。不然令我愁欲死。

寄宿田家

田家老翁住東陂。說道平生隱在茲。鬢白未曾記日月。山青每到識春時。門前種柳深成巷。野谷流泉添入池。牛壯日耕十畝地。人閑常掃一茆茨。客來滿酌清罇酒。感興平吟才子詩。巖際窟中藏鰕鼠。潭邊竹裏隱鷓鴣。村墟日落行人少。醉後無心怯路岐。今夜只應還寄宿。明朝拂曙與君辭。

人日寄杜二拾遺

人日題詩寄草堂。遙憐故人思故鄉。柳條弄色不忍見。梅花滿枝空斷腸。身在南蕃無所預。心懷百憂復千慮。今年人日空相憶。明年人日知何處。一臥東山三十春。豈知書劍老風塵。龍鍾還添二千石。愧爾東西南北人。

塞下曲

君不見芳樹枝。春花落盡蜂不窺。君不見梁上泥。秋風始高燕不栖。蕩子從軍事征戰。蛾眉嬋娟守空閨。
獨宿自然堪下淚。況復時聞鳥夜啼。





高常侍集卷下

五言律詩

武威同諸公過楊七山人

幕府日多暇。田家歲復登。相知恨不早。乘興乃無恆。窮巷在喬木。深齋垂古藤。邊城唯有醉。此外更何能。

入昌松東界山行

鳥道幾登頓。馬啼無暫閒。崎嶇出長坂。合沓猶前山。石激水流處。天寒松色間。王程應未盡。且莫顧刀鐮。

送白少府送兵之隴右

殘更登隴首。遠別指臨洮。爲問關中事。何如州縣勞。軍容隨赤羽。樹色引青袍。誰斷單于臂。今年太白高。

河西送李十七

邊城多遠別。此去莫徒然。問禮知才子。登科及少年。出門看落日。驅馬向秋天。高價人爭重。行當早著鞭。

醉後贈張九旭

世上謾相識。此翁殊不然。興來書自聖。醉後語猶顛。白髮老閉事。青雲在目前。牀頭一壺酒。能更幾回眠。

酬衛八雪中見贈

季冬憶淇上。落日歸山樊。舊宅帶流水。平田臨古村。雪中望來信。醉裏開衡門。果得希代寶。緘之那可論。

同衛八題陸少府書齋

知君薄州縣。好靜無冬春。散帙至棲鳥。明燈留故人。深房臘酒熟。高院梅花新。若是周旋地。當令風義親。

送張瑤貶五溪尉

他日維貞幹。明時懸鑊鄣。江山遙去國。妻子獨還家。離別無嫌遠。沈浮無強嗟。南登有詞賦。知爾吊長沙。

別韋五

徒然酌杯酒。不覺散人愁。相識仍遠別。欲歸翻旅遊。夏雲滿郊甸。明月照河洲。莫恨征途遠。東看漳水流。

別劉大校書

昔日京華去。知君才望新。應猶作賦好。莫歎在官貧。且復傷遠別。不然愁此身。青楓幾萬里。江上一歸人。

宋中別司功叔各賦一物

商邱試一望。隱隱帶秋天。地與星辰在。城將大路遷。干戈悲昔事。墟落對窮年。卽此傷離緒。淒淒賦酒筵。

送蔡十二之海上

黯然而所爲。相對益悲酸。季弟念離別。賢兄救急難。河流冰處盡。海路雪中寒。尙有南飛鷹。知君不忍看。

宴郭校書因之有別

綵服趨庭訓。分交載酒過。芸香名早著。蓬轉事仍多。苦戰知機息。窮愁柰別何。雲霄莫相待。年鬢已蹉跎。

別韋兵曹

離別長千里。相逢數十年。此心應不變。他事已徒然。惆悵春光裏。蹉跎柳色前。逢時當自取。有爾欲先鞭。

獨孤判官部送兵

餞君嗟遠別。爲客念周旋。征路今如此。前軍猶眇然。出關逢漢壁。登隴望胡天。亦是封侯地。期君早著鞭。

別從甥萬盈

諸生曰萬盈。四十乃知名。宅相予偏重。家邱人莫輕。美才應自料。苦節豈無成。莫以山田薄。今春又不耕。

別崔少府

知君少得意。汶上掩柴扉。寒食仍留火。春風未授衣。皆言黃綬屈。早向青雲飛。借問他鄉事。今年歸不歸。

別馮判官

碣石遼西地。漁陽薊北天。關山唯一道。雨雪盡三邊。才子方爲客。將軍正渴賢。遙知幕府下。書記日翩翩。

同李太守北池泛舟宴高平鄭太守

每揖龔黃事。還陪李郭舟。雲從四岳起。水向百城流。幽意隨登陟。嘉言卽獻酬。乃知縫掖貴。今日對諸侯。

同崔員外綦母拾遺九日宴京兆府李士曹

今日好相見。羣賢仍廢曹。晚晴催翰墨。秋興引風騷。絳葉擁虛砌。黃花隨濁醪。閉門無不可。何事更登高。

送崔功曹赴越

傳有東南別。題詩報客居。江山知不厭。州縣復何如。莫恨吳歛曲。當看越絕書。今朝欲乘興。隨爾食鱸魚。

送蹇秀才赴臨洮

悵望日千里。如何今二毛。猶思陽谷去。莫厭隴山高。倚馬見雄筆。隨身唯寶刀。料君終自致。勳業在臨洮。

淇上送韋司倉往滑臺

飲酒莫辭醉。醉多適不愁。孰知非遠別。終念對窮秋。滑臺門外見。淇水眼前流。君去應回首。風波滿渡頭。

使青夷軍入居庸三首

匹馬行將久。征途去轉難。不知邊地別。祇訝客衣單。溪冷泉聲苦。山空木葉乾。莫言關塞極。雲雪尙漫漫。古鎮青山口。寒風落日時。巖巒鳥不過。冰雪馬堪遲。出塞應無策。還家賴有期。東山足松桂。歸去結茅茨。登頓驅征騎。棲遲愧寶刀。遠行今若此。微祿果徒勞。絕坂水連下。羣峰雲共高。自堪成白首。何事一青袍。

自薊北歸

驅馬薊門北。北風邊馬哀。蒼茫遠山口。豁達胡天開。五將已深入。前軍止半迴。誰憐不得意。長劍獨歸來。

途中寄徐錄事

落日風雨至。秋天鴻雁初。離憂不堪比。旅館復何如。君又幾時去。我知音信疎。空多篋中贈。長見右軍書。

廣陵別鄭處士

落日知分手。春風莫斷腸。興來無不愜。才在亦何傷。溪水堪垂釣。江田耐插秧。人生只爲此。亦足傲羲皇。

別孫訢

離人去復留。白馬黑貂裘。屈指論前事。停鞭惜舊遊。帝鄉那可安。旅館日堪愁。誰念無知己。年年睢水流。

送劉評事充朔方判官賦得征馬嘶

征馬向邊州。蕭蕭嘶不休。思深應帶別。聲斷爲兼秋。岐路風將遠。關山月共愁。贈君從此去。何日大刀頭。

送魏八

更沽淇上酒。還泛驛前舟。爲惜故人去。復憐嘶馬愁。雲山行處合。風雨興中秋。北路無知己。明珠莫暗投。

贈別褚山人

攜手贈將行。山人道姓名。光陰薊子訓。才術褚先生。墻上梨花白。罇中桂酒清。洛陽無二價。猶是慕風聲。

別王八

征馬嘶長路。離人挹佩刀。客來東道遠。歸去北風高。時候何蕭索。鄉心更鬱陶。傳君遇知己。行日有綈袍。

送董判官

逢君說行邁。倚劍別交親。幕府爲才子。將軍作主人。近關多雨雪。出塞有風塵。長策須當用。男兒莫顧身。

同羣公登濮陽聖佛寺閣

落日登臨處。悠然意不窮。佛因初地識。人覺四天空。來雁清霜後。孤帆遠樹中。徘徊傷寓目。蕭索對寒風。

同羣公十月朝宴李太守宅

良牧徵高賞。寒帷問考槃。歲時當正月。甲子入初寒。已聽甘棠頌。欣陪旨酒歡。仍憐門下客。不作布衣看。

送裴別將之安西

絕域眇難躋。悠然信馬啼。風塵驚跋涉。搖落怨睽攜。地出流沙外。天長甲子西。少年無不可。行矣莫悽悽。

部落曲

蕃軍傍塞遊。代馬噴風秋。老將垂金甲。闕支著錦裘。琕戈蒙豹尾。紅旆插狼頭。日暮天山下。鳴笳漢使愁。

送鄭侍御謫閩中

謫去君無恨。閩中我舊過。大都秋雁少。只是夜猿多。東路雲山合。南天瘴癘和。自當逢雨露。行矣慎風波。

送李侍御赴安西

行子對飛蓬。金鞭指鐵驄。功名萬里外。心事一杯中。虜障燕支北。秦城太白東。離魂莫惆悵。看取寶刀雄。

贈杜二拾遺

傳道招提客。詩書自討論。佛香時入院。僧飯屢過門。聽法還應難。尋經剩欲翻。草元今已畢。此外復何言。

七言律詩

金城北樓

北樓西望滿晴空。積水連山勝畫中。湍上急流聲若箭。城頭殘月勢如弓。垂竿已謝磻溪老。體道猶思塞上翁。爲問邊庭更何事。至今羌笛怨無窮。

送前衛縣李案少府

黃鳥翩翩楊柳垂。春風送客使人悲。怨別自驚千里外。論交卻憶十年時。雲開汶水孤帆遠。路繞梁山匹馬遲。此地從來可乘興。留君不住益淒其。

夜別韋司士

高館張燈酒復清。夜鐘殘月雁歸聲。只言啼鳥堪求侶。無那春風欲送行。黃河曲裏沙爲岸。白馬津邊柳向城。莫怨他鄉暫離別。知君到處有逢迎。

同顏少府旅宦秋中

傳君昨夜悵然悲。獨坐新齋木落時。逸氣舊來凌燕雀。高才何得混妍媸。迹留黃綬人多歎。心在青雲世莫知。不是鬼神無正直。從來州縣有瑕疵。

同陳留崔司戶早春宴蓬池

同官載酒出郊圻。晴日東馳雁北飛。隔岸春雲邀翰墨。傍簷垂柳報芳菲。池邊轉覺虛無盡。臺上偏宜酌酒歸。州縣徒勞那可度。後時連騎莫相違。

送李少府貶峽中王少府貶長沙

嗟君此別意何如。駐馬銜杯問謫居。巫峽啼猿數行淚。衡陽歸雁幾封書。青楓江上秋天遠。白帝城邊古木疎。聖代卽今多雨露。暫時分手莫躊躇。

重陽

節物驚心兩鬢華。東籬空繞未開花。百年將半任三已。五畝就荒天一涯。豈有白衣來剝啄。亦從烏帽自欹斜。真成獨坐空搔首。門柳蕭蕭噪暮鴉。

五言律

秋日作

端居值秋節。此日更愁辛。寂寞無一事。蒿萊通四鄰。閉門生白髮。回首憶青春。歲月不相待。交游隨衆人。雲霄何處託。愚直有誰親。舉酒聊自勸。窮通信爾身。

陪竇侍御泛靈雲池

白露時先降。清川思不窮。江湖仍塞上。舟楫在軍中。舞換臨津樹。歌饒向晚風。夕陽連積水。邊色滿秋空。乘興宜投轄。邀歡莫避驄。誰憐持弱羽。猶欲伴鷓鴣。

陪竇侍御靈雲南亭宴詩并序

涼州近胡。高下其池。亭蓋以耀蕃落也。幕府董帥雄勇。徑踐戎庭。自陽關而西。猶枕席矣。軍中無事。君子飲食宴樂。宜哉。白簡在邊。清秋多興。況水具舟楫。山兼亭臺。始臨泛而寫煩。俄登陟以寄傲。絲桐徐奏。林木更爽。觴蒲萄以遞歡。指蘭茝而可掇。胡天一望。雲物蒼然。雨蕭蕭而牧馬聲斷。風嫋嫋而邊歌幾處。又足悲矣。員外李公曰。七日者何。牛女之夕也。夫賢者何得謹其時。請賦南亭詩。列之于後。

人幽宜眺聽。目極喜亭臺。風景知愁在。關山憶夢迴。祇言殊語默。何意忝遊陪。連倡波瀾動。冥搜物象開。新秋歸遠樹。殘雨擁輕雷。簷外長天盡。尊前獨鳥來。常吟塞下曲。多謝幕中才。河漢徒相望。嘉期安在哉。

和竇侍御登涼州七級浮圖之作

化塔屹中起。孤高宜上躋。鐵冠雄賞眺。金界寵招攜。空色在軒戶。邊聲連鼓鼙。天寒萬里北。地豁九州西。清興揖才彥。峻風和端倪。始知陽春後。具物皆筌蹄。

同熊少府題盧主簿茅齋

虛院野情在。茅齋秋興存。孝廉趨下位。才子出高門。乃繼幽人靜。能令學者尊。江山歸謝客。神鬼下劉根。階樹時攀折。牕書任討論。自堪成獨往。何必武陵源。

同朱五題盧使君義井

高義唯良牧。深仁自下車。甯知鑿井處。還是飲冰餘。地卽泉源久。人當汲引初。體清能鑒物。色洞每含虛。上善滋來往。中和浹里閭。濟時應未竭。懷惠復何如。

同郭十題楊主簿新廳

華館曙沈沈。惟良正在今。用材兼柱石。開物象高深。更得芝蘭地。乘榮枳棘林。向風扃戟戶。當署近棠陰。勿改安卑節。聊閑理劇心。多君有知己。一和郢中吟。

送蔡少府赴登州推事

膠東連卽墨。萊水入滄溟。國小常多事。人訛屢抵刑。公才徵郡邑。詔使出郊坰。標格誰當犯。風謠信可聽。崢嶸大峴口。邈迤汶陽亭。地迴雲偏白。天秋山更青。祖筵方卜晝。王事急侵星。勸爾將爲德。斯言蓋有聽。秦中送李九赴越

攜手望千里。于今將十年。如何每離別。心事復連連。適越雖有以。出關終耿然。愁臨不可向。長路或難前。吳會獨行客。山陰秋夜船。謝家徵故事。禹穴訪遺編。鏡水君所憶。蕙羹予舊便。歸來莫忘此。兼示濟江篇。古樂府飛龍曲留上陳左相

德以精靈降。時膺夢寐求。蒼生謝安石。天子富平侯。尊俎資高論。巖廊挹大猷。相門連戶牖。卿族嗣弓裘。豁達雲開霽。清明月映秋。能爲吉甫頌。善用子房籌。階砌思攀陟。門闌高阻修。高山不易仰。大匠本難投。迹與松喬合。心緣啓沃留。公才山吏部。書癖杜荊州。幸木千年聖。何辭一尉休。折腰知寵辱。迴首見沈浮。天地莊生馬。江湖范蠡舟。逍遙堪自樂。浩蕩信無憂。去此從黃綬。歸歟任白頭。風塵與霄漢。瞻望日悠悠。

留上李右相

風俗登淳古。君臣挹大庭。深沈謀九德。密勿契千齡。獨立調元氣。清心豁窅冥。本枝連帝系。長策冠生靈。傅說明殷道。蕭何律漢刑。鈞衡持國柄。柱石總賢經。隱軫江山藻。氛氳鼎鼐銘。興中皆白雪。身外卽丹青。江海呼窮鳥。詩書問聚螢。吹噓成羽翼。提握動芳馨。倚伏悲還笑。棲遲醉復醒。恩榮初就列。含育忝宵形。有竊邱山惠。無時枕席甯。壯心瞻落景。生事感流萍。莫以才難用。終期善易聽。未爲門下客。徒謝少微星。

辟陽城

荒城在高岸。凌眺俯清淇。傳道漢天子。而封審食其。奸淫且不戮。茅土孰云宜。何得英雄主。返令兒女欺。母儀良已久。臣節豈如斯。太息一朝事。乃令人所嗤。

信安王幕府詩并序

開元二十年。國家有事。林胡。詔禮部尚書信安王總戎大舉。時考功郎中王公。司勳郎中劉公。主客郎中魏公。侍御史李公。監察御史崔公。咸在幕府。詩以頌美。數公見于詞。

雲紀軒皇代。星高太白年。廟堂咨上策。幕府制中權。盤石藩維固。昇壇禮樂先。國章榮印綬。公服貴貂蟬。樂善旌深德。輸忠格上元。剪桐光寵錫。題劍美貞堅。聖祚雄圖廣。師貞武德虔。雷霆七校發。旌旆五營連。華省徵羣乂。霜臺舉二賢。豈伊公望遠。曾是茂才遷。並秉韜鈴術。兼該翰墨筵。帝思麒麟像。臣獻柏梁篇。振玉登遼甸。縱金歷薊壩。度河飛羽檄。橫海泛樓船。北伐聲逾邁。東征務以專。講戎喧涿野。料敵靜居延。軍勢持三略。兵戎自九天。朝瞻授鉞去。時聽偃戈旋。大漠風沙裏。長城雨雪邊。雲端臨碣石。波際隱朝鮮。夜壁衝高斗。寒空駐綵旃。倚弓元兔月。飲馬白狼川。庶物隨交泰。蒼生解倒懸。四郊增氣象。萬里絕風煙。關塞鴻勳著。京華甲第全。落梅橫吹後。春色凱歌前。直道常兼濟。微才獨棄捐。曳裾誠已矣。投筆尙悽然。作賦同元淑。能詩匪仲宣。雲霄不可望。空欲仰神仙。

奉酬睢陽李太守

公族稱王佐。朝經允帝求。本枝彊我李。磐石冠諸劉。禮樂光輝盛。山河氣象幽。系高周柱史。名重晉陽秋。華省應推擇。青雲寵宴遊。握蘭多具美。前席有嘉謀。賦得黃金賜。言皆白璧酬。著鞭驅駟馬。操刃解全牛。出鎮兼方伯。承家復列侯。朝瞻孔北海。時用杜荊州。廣固纔登陟。毘陵忽阻修。三台冀入夢。四嶽尙分憂。郡邑連京口。山川望石頭。海門當建節。江路引鳴騶。俗見中興理。人逢至道休。先移白額橫。更息赭衣偷。梁國歌來晚。徐方怨不留。豈伊齊政術。將以變澆浮。訟簡知能吏。刑寬察要囚。坐堂風偃草。行縣雨隨朝。地是蒙莊宅。城遺闕伯邱。孝王餘井徑。微子故田疇。冬至招搖轉。天寒蟬竦收。猿巖飛雨雪。兔苑落梧楸。列戟霜侵戶。褰幃月在鈎。好賢常解榻。乘興每登樓。逸足橫千里。高談注九流。詩題青玉案。衣贈黑貂裘。窮巷軒車靜。閑齋耳目愁。未能方管樂。翻欲慕巢由。講德良難敵。觀風豈易儔。寸心仍有適。江海一扁舟。

奉酬路太守見贈之作

盛才膺命代。高價動良時。帝簡登藩翰。人和發詠思。神仙去華省。鴛鷺憶丹墀。清淨能無事。優游卽賦詩。江山分想像。雲物共萎蕤。逸氣劉公幹。元言向子期。多慙汲引速。翻愧激昂遲。相馬知何限。登龍反自疑。風塵吏道迫。行邁旅心悲。拙疾徒爲爾。窮愁欲問誰。秋庭一片葉。朝鏡數莖絲。州縣甘無取。邱園悔莫追。瓊瑤生篋笥。光景滿茅茨。他日青雲騎。猶應訪所之。

餞宋八充彭中丞判官之嶺外

觀君濟時略。使我氣填膺。長策竟不用。高才徒見稱。一朝知己達。累日詔書徵。羽翮忽然就。風颭誰敢凌。

舉鞭趨嶺嶠。屈指冒炎蒸。北雁送馳驛。南人思飲冰。彼邦本倔強。習俗多驕矜。翠羽干平法。黃金撓直繩。若將除害馬。慎勿信蒼蠅。魍魎甯無患。忠貞適有憑。猿啼山不斷。鳶跼路難登。海岸出交趾。江城連始興。繡衣當節制。幕府盛威稜。勿憚九疑險。須令百越澄。立談多感激。行李卽嚴凝。離別胡爲者。雲霄遲爾升。

送柴司戶充劉卿判官之嶺外

嶺外資雄鎮。朝端寵節旄。月卿臨幕府。星使出詞曹。海對羊城闊。山連象郡高。風霜驅瘴癘。忠信涉波濤。別恨隨流水。交情脫寶刀。有才無不適。行矣莫徒勞。

同李員外賀哥舒大夫破九曲之作

遙傳副丞相。昨日破西蕃。作氣羣山動。揚軍大旆翻。奇兵邀轉戰。連弩絕歸奔。泉噴諸戎血。風驅死虜魂。頭飛攢萬戟。面縛聚轅門。鬼哭黃埃暮。天愁白日昏。石城與巖險。鐵騎皆雲屯。長策一言決。高蹤百代存。威稜懾沙漠。忠義感乾坤。老將黯無色。儒生安敢論。解圍憑廟算。止殺報君恩。唯有關河眇。蒼茫空樹墩。

酬河南節度使賀蘭大夫見贈之作

高閣憑欄檻。中軍倚旆旌。感時常激切。於已卽忘情。河華屯妖氣。伊瀍有戰聲。媿無戡難策。多謝出師名。秉鉞知恩重。臨戎覺命輕。服肱瞻列岳。脣齒賴長城。隱隱摧鋒勢。光光弄印榮。魯連真義士。陸遜豈書生。直道甯殊智。先鞭忽抗行。楚雲隨去馬。淮月尙連營。撫劍堪投分。悲歌益不平。從來重然諾。況值欲橫行。

赴彭州山行之作

峭壁連崆峒。攢峯疊翠微。鳥聲堪駐馬。林色可忘機。怪石時侵徑。輕蘿乍拂衣。路長愁作客。年老更思歸。且悅巖巒勝。甯嗟意緒違。山行應未盡。誰與玩芳菲。

東平旅遊奉贈薛太守二十四韻

頌美馳千古。欽賢仰大猷。晉公標逸氣。汾水注長流。神與公忠節。天生將相儔。青雲本自負。赤縣獨推尤。御史風逾勁。郎官草屢修。鴛鸞粉署起。鷹隼柏臺秋。出入交三事。飛鳴揖五侯。軍書陳上策。廷議借前籌。肅肅趨朝列。離離引帝求。一麾俄出守。千里再分憂。不改任棠水。仍傳晏子裘。歌謠隨舉扇。旌旆逐鳴騶。郡國長河遠。川源大野幽。地連堯秦嶽。山向禹青州。汶上春帆渡。秦亭晚日愁。遺墟當少昊。懸象逼奎婁。卽此逢清鑒。終然喜暗投。叨承解榻禮。更得問縑遊。高興陪登陟。嘉言忝獻酬。觀棊知戰勝。探象會冥搜。眺聽情何限。沖融惠勿休。祗應齊語默。甯肯問沈浮。然諾長懷季。栖遑輒累邱。平生感知已。方寸豈悠悠。

真定卽事奉贈韋使君二十八韻

漂泊懷書客。遲迴此路隅。問津驚棄置。投刺忽踟蹰。方伯恩彌重。蒼生詠已蘇。郡稱廉叔度。朝議管夷吾。乃繼三台側。仍將四岳俱。江山澄氣象。崖谷倚冰壺。詔寵金門策。官榮葉縣臯。擢才登紛署。飛步躡雲衢。起草徵調墨。焚香卽宴娛。光華揚盛矣。霄漢在茲乎。隱軫推公望。逶迤協帝俞。軒車辭魏闕。旌節副幽都。始佩仙郎印。俄兼太守符。尤多蜀郡理。更得潁川謨。城邑推雄鎮。山川列簡圖。舊燕當絕漠。全趙對平蕪。曠野何瀾漫。長亭復鬱紆。始泉遺俗近。活水戰場無。月換思鄉陌。星迴記斗樞。歲容歸萬象。和氣發鴻鑪。

淪落而誰遇。栖遑有是夫。不才羞擁腫。干祿謝侏儒。契闊慙行邁。羈離憶有于。田園同季子。儲畜異陶朱。方欲呈高義。吹噓揖大巫。永懷吐肝膽。猶憚阻榮枯。解榻情何限。忘言道未殊。從來貴縫掖。應是念窮途。

五言絕句

詠史

尙有綈袍贈。應憐范叔寒。不知天下士。猶作布衣看。

田家春望

出門何所見。春色滿平蕪。可歎無知己。高陽一酒徒。

閒居

柳色驚心事。春風厭索居。方知一杯酒。猶勝百家書。

送兵到薊北

積雪與天迥。屯軍連塞愁。誰知此行邁。不爲覓封侯。

封邱作

州縣才難適。雲山道欲窮。揣摩慙點吏。棲隱謝愚公。

同羣公題張處士菜園

畊地桑柘間。地肥菜常熟。爲問葵藿資。何如廟堂肉。

逢謝偃

紅顏創爲別，白髮始相逢。唯餘昔時慮，無復舊時容。

感五溪薺菜

兩京作薺賣，五溪無人採。夷夏雖有殊，氣味終不改。

七言絕句

除夜作

旅館寒燈獨不眠，客心何事轉悽然。故鄉今夜思千里，霜鬢明朝又一年。

初至封邱作

可憐薄暮宦遊子，獨臥虛齋思無已。去家百里不得歸，到官數日秋風起。

別董大二首

千里黃雲白日曛，北風吹雁雪紛紛。莫愁前路無知己，天下誰人不識君。六翮飄颻私自憐，一離京洛十餘年。丈夫貧賤應未足，今日相逢無酒錢。

營州歌

營州少年厭原野，皮裘蒙茸獵城下。虜酒千鍾不醉人，胡兒十歲能騎馬。

送桂陽孝廉

桂陽少年西入秦。數經甲科猶白身。卽今江海一歸客。他日雲霄萬里人。
聽張立本女吟

危冠廣袖楚宮粧。獨步閑庭逐夜涼。自把玉簪敲砌竹。清歌一曲月如霜。
塞上聽吹笛

雪淨胡天牧馬還。月明羌笛戍樓間。借問梅花何處落。風吹一夜滿關山。

送李少府

相逢旅館意多違。暮雪初晴候雁飛。主人酒盡君未醉。薄暮途遙歸不歸。

九曲詞三首

許國從來徹廟堂。連年不爲在壇場。將軍天上封侯印。御史臺中異姓王。
萬騎爭歌楊柳春。千場對舞繡麒麟。到處盡逢歡洽事。相看總是太平人。
鐵騎橫行鐵嶺頭。西看邏虜取封侯。青海只今將飲馬。黃河不用更防秋。



